

Mangosuthu Buthelezi

Hoofman **Mangosuthu Gatsha Buthelezi** was 'n Suid-Afrikaanse staatsman, **parlementariër** (lid van die parlement), die stigter van die Inkatha-Vryheidsparty (Engels: Inkatha Freedom Party) en 'n prominente **struggle-leier** ('n leier in die stryd om **apartheid** te beëindig). Hy was ook tien jaar lank, van 1994 tot 2004, **Suid-Afrika** se minister van binnelandse sake.



Die Inkatha-vryheidsparty se vlag.

Agtergrond

Mangosuthu Buthelezi is op 27 Augustus 1928 op Mahlabathini in **KwaZulu-Natal** gebore. Sy ma, Magogo kaDinuzulu, was die dogter van die voormalige Zoeloe-koning, **Dinuzulu kaCetshwayo**, en die suster van die Zoeloe-koning wat toe aan bewind was, Solomon kaDinuzulu. Ons kan dus **met reg** na hom as 'n prins verwys.



Die voormalige Zoeloe-koning Dinuzulu kaCetshwayo.

Sy pa, Mathole Buthelezi, was 'n tradisionele **leier** en die hoof van die Buthelezi-**clan** ('n groep families wat almal van dieselfde voorvader afstam). As die oudste seun sou hy ook later die hoof van die Buthelezi's word. Daar word soms na hom verwys met sy clannaam "Shenge".

Hy het by Impumalanga Primêre Skool op Nongoma en Adams-kollege in Amanzimtoti skoolgegaan, en later by die Universiteit van Fort Hare studeer. Dit was hier waar hy met anti-apartheidsleiers soos professor **Z.K. Matthews** en Robert Subukwe **in aanraking gekom** (te doen gekry) het, en het gereeld erken watter invloed hierdie leiers en mense soos hoofman **Albert Luthuli**, **Oliver Tambo**, **Nelson Mandela** en **Mahatma Gandhi** op hom gehad het.



Albert Luthuli het 'n groot invloed op Buthelezi gehad.

Hy het in 1949 by die ANC se Jeugliga aangesluit. In 1950 het die universiteit hom geskors toe hy aan protesaksies deelgeneem het. Gelukkig het die Universiteit van Natal hom toegelaat om klasse by te woon en eksamen te skryf sodat hy sy graad in geskiedenis kon voltooi. ¹

Die stryd teen apartheid

Buthelezi was van die begin af baie geïnteresseerd in die politiek, en het gou 'n loopbaan daarvan gemaak. Sy pa is in 1942 oorlede toe hy net 14 jaar oud was, en sy oom het intussen in sy plek as leier opgetree. ² In 1953 is hy terug KwaZulu-Natal toe om die hoof van die Buthelezi-clan te word.

Nadat die Nasionale Party in 1948 aan bewind gekom het, is verskeie wette afgekondig (ingestel) om wit en swart burgers van die land te skei en afgesonder van mekaar te laat leef. Hierdie beleid het as apartheid bekend gestaan.



Nelson Mandela jare ná sy vrylating in sy tronksel op Robbeneiland.

Van hierdie wette het dit onwettig gemaak vir swart en wit mense om uit te gaan of te trou. ³ Ander, soos die Groepsgebiedewet, het sekere plekke en buurte **eksklusief** (slegs) vir die gebruik van wit mense gemaak. ⁴

Swart leiers het sterk **beswaar gemaak** (geprotesteer) teen die beleid en teen die wette. In 1952 het swart burgers begin met 'n veldtog van **verset** teen apartheid. Hulle het van hierdie wette wat hulle geglo het verkeerd is, begin "oortree". Hulle sou byvoorbeeld op parkbankies gaan sit wat net vir wit mense bedoel was, of laat in die aand buite wees wanneer hulle veronderstel was om in hul huise te bly. In 1956 is Nelson Mandela vir **hoogverraad** (verraad teen die land) gearresteer, en in 1960 is die [African National Congress \(ANC\)](#) **verban**. Baie van die leiers van die beweging is verban of het buiteland toe gevlug. ⁵



Mahatma Gandhi was ook 'n voorstander van vreedsame verzet.

Buthelezi het hom ook teen die apartheidswette uitgespreek, en toe hy Oliver

Tambo in 1963 in Londen ontmoet het, het die Suid-Afrikaanse regering sy paspoort gekonfiskeer. Hy was egter nie ten gunste van **buitelandse sanksies** (strafmaatreëls waarmee ander lande 'n land probeer dwing om sy binnelandse beleid te verander) teen [Suid-Afrika](#) nie. Hy het gesê sulke sanksies sal die armste van die armstes die ergste tref, en hy wou sy eie mense, die [Zoeloes](#), teen sulke swaarkry beskerm. Hy was ook nie ten gunste van die [geweld](#) waarmee die ANC teen apartheid geprotesteer het nie. Vir hom was die beleid van vreedsame **verset** (teenstand sonder geweld) waarvolgens die ANC gestig is, die regte manier om te protesteer. ⁶



Oliver Tambo en Buthelezi het mekaar in 1963 in Londen ontmoet.

Hierdie houding het hom ongewild gemaak by die ANC, en baie swart leiers het hom as 'n **strooipop** (iemand wat doen wat iemand anders sê) van die apartheidsregering **bestempel**. Dit sou later tot groot **konflik** tussen sy party en die ANC lei. ¹ [\[Lees meer oor konflik.\]](#)

Die leier van die Zoeloes

Buthelezi het in die vyftiger- en sestigerjare van die vorige eeu (1950's en 1960's) hard daaraan gewerk om 'n identiteit vir die Zoeloe-volk te vestig en om 'n gevoel van [nasionanisme](#) onder sy mense te **kweek**. Toe dr. [H.F. Verwoerd](#) in Oktober 1955 by 'n **imbizo** (byeenkoms wat deur 'n tradisionele leier gereël is) met Zoeloe-leiers kom praat het, het die jong Mangosuthu Buthelezi die taak gehad om hom te antwoord. Hy het dit só goed gedoen dat hy die bewondering van die hele Zoeloe-volk **verwerf** het. ²

Hoewel Buthelezi ook sterk teen apartheid gekant was, het hy geglo 'n mens moet dié stelsel “van binne af” probeer **omkeer** (verander). ⁵ In 1959 het die apartheidsregering die idee van tuislande begin **propageer**. Elke swart volk in Suid-Afrika sou so 'n stuk grond kry waar hulle taal en kultuur sou kon groei, en waar hulle leiers onder toesig van die apartheidsregering oor hul volk kon regeer.

⁷



Die swart leiers het nie hierdie idee ondersteun nie. Hulle het gesê dat dit 'n manier was om swart mense se regte te **ondermyn** (beperk) terwyl dit lyk asof hulle ook die land regeer. Maar Albert Luthuli en Oliver Tambo het Buthelezi in 1970 aangeraai om die posisie van uitvoerende hoof van die Zoeloe-gebiedsgesagsliggaam te aanvaar sodat hy binne die strukture die stryd teen apartheid kon voortsit. ²

In 1975 het hy nuwe lewe in die Zoeloe-nasie se **samehorigheid** geblaas toe hy die Inkatha ye Nkululeke ye Sizwe (nasionale kulturele bevrydingsbeweging) gestig het. Dit was die begin van die party wat later as die [Inkatha-Vryheidsparty \(IVP\)](#) bekend sou staan. Hy was die hoof van die party tot in 2019. ⁶

In 1976 word hy die hoofminister van die KwaZulu-regering, en hy stig Ithala-bank, 'n bank wat lenings aan swart mense **toegestaan** het omdat hulle nie by gewone banke lenings kon kry nie. Daardeur het hy aan Zoeloes die geleentheid gegee om ook besighede te begin. In 1979 stig hy die Mangosuthu-tegnikon, 'n opleidingsentrum vir swart jongmense waar hulle ambagte kon aanleer en vir hulself 'n lewe kon maak. Hy word ook die kanselier van die Universiteit van Zoeloeland, 'n posisie wat hy 21 jaar lank sou beklee. ²



Konflik en versoening

In die 1980's het die stryd teen apartheid gewelddadig geword. Dit was ook 'n tyd waarin die stryd tussen die ANC en die IVP baie **bloedvergieting** tot gevolg gehad het. Die IVP was **primêr** 'n party vir Zoeloes, terwyl die ANC die hele swart bevolking van Suid-Afrika wou verteenwoordig. Toe die ANC in 1990 **ontban** is en die samesprekings vir 'n nuwe, demokratiese Suid-Afrika begin het, het die ondersteuners van die twee partye **slaags geraak**, en duisende mense aan die Witwatersrand en in KwaZulu-Natal is dood. ⁶

Toe die eerste demokratiese verkiesing in Suid-Afrika in 1994 gehou is, het Buthelezi aanvanklik gedreig om dit te **boikot** omdat hy nie tevrede was met die voorlopige grondwet nie. Hy het eers 'n week voor die verkiesing ingestem om ook deel te neem. Die IVP het omtrent 10% van al die stemme gekry, en het die

meerderheid van die stemme in KwaZulu-Natal verwerf.

Hy is tot die **Nasionale Vergadering** van die [Suid-Afrikaanse parlement](#) verkies, en hy is onder Suid-Afrika se eerste swart president, Nelson Mandela, aangestel as minister van binnelandse sake. Hy het dié aanstelling tot 2004 onder pres. Thabo Mbeki behou. ¹

Mangosuthu Buthelezi is op 9 September 2023 in die ouderdom van 95 in Ulundi in KwaZulu-Natal oorlede.



Buthelezi was die minister van binnelandse sake in Thabo Mbeki (foto) en Nelson Mandela se regerings.

Woordbank

bestempel	Beskryf.
beswaar maak	Protesteer.
bloedvergieting	Dood; sterftes.
boikot	Weier om deel te neem.
buitelandse sanksies	Strafmaatreëls waarmee ander lande 'n land probeer dwing om sy binnelandse beleid te verander.
clan	'n Groep families wat almal van dieselfde voorvader afstam.
eksklusief	Slegs.
hoogverraad	Verraad teen die land.
imbizo	Byeenkoms wat deur 'n tradisionele leier gereël word.
in aanraking gekom	Te doen kry.
jou uitspreek teen iets	Daarteen praat; sê dat jy nie saamstem nie.
konflik	Stryd.
kweek	Laat groei.

met reg	Korrek.
'n posisie beklee	In die posisie wees; in die pos aangestel wees.
Nasionale Vergadering	Die Suid-Afrikaanse parlement.
omkeer	Verander.
ondermyn	Beperk; verswak; minder maak.
ontban	'n Verbanning ophef; nie meer verban nie.
parlementariër	Lid van die parlement.
primêr	Eintlik; in die eerste plek.
propageer	Bevorder; adverteer.
samehorigheid	Die gevoel van mense dat hulle saam hoort.
slaags geraak	Veg; baklei.
strooipop	Iemand wat doen wat iemand anders sê.
Struggle	Die stryd om apartheid te beëindig.
Struggle-leier	'n Leier in die stryd teen apartheid.
tereg	Met reg; korrek.
toegestaan	Goedkeur en gee.
verban	Verbied om in die land te wees of te bestaan.
verset	Teenstand.
verwerf	Kry.
vreedsame verset	Teenstand sonder geweld.
wette afkondig	Wette maak en instel.

Lees dié artikels om meer te leer

- ['n Kort opsomming van al sy prestasies](#)
- ['n Transkripsie van 'n onderhoud waarin Buthelezi self oor sy idees praat](#)

Kyk dié video's om meer te wete te kom

'n Gesprek met Buthelezi oor sy geskiedenis en sy rol in die land se politiek

Die konflik tussen die IVP en die ANC voor die 1994-verkiesing